


Hao² tok. yat₄ tch'ao³
Journal de controverse.
série en 4 tomes

1872



BANION MÈRE DES SŒURS
MISSIONNAIRES DE L'IMMACULÉE-CONCEPTION
2000, CHEMIN SAINTE-CATHERINE
CÔTE-DU-NORD, MONTREAL, P. Q., CANADA

口鐸日抄第三卷紀事

MAISON MERE DES SOEURS
MISSIONNAIRES DE L'IMMACULEE-CONCEPTION
2900, CHEMIN SAINTE-CATHERINE
COTE-DES-NEIGES MONTREAL, P. Q., CANADA

辛未冬初、余爲省覲東粵、偕艾先生同至蒲陽、越旬告別、先生謂余曰、吾子過清漳、爲言嚴子思叅、訂晤溫陵、余應曰、諾、維時驅車就道、日馳騁荒山斷澗之區、與夫勞人牧豎之側、向來提耳鐸音、杳如天際、雅欲一劄述而無從也、比入桃源、一謁張令公、過溫陵、再謁諸葛民部明師在遠、良友

可親。蓋深幸此行之匪虛已。至若清漳接壤。已在復月之杪。余思思叅以庚午秋闈一再晤對。今歲逾一周矣。夫以數百里不相謀之地。十數月不再訂之期。萬一主賓相左。悵惋何極。于時仰祈主祐。以今晚得晤嚴子爲禱。比抵清漳。而思叅則遠讀海澄。去家二百里而遙也。快望之情。未能已已。詎意甫八夜。忽有維舟江澗者。而思

叅至矣。兩人握手，諄諄道故，因述頃來默禱之由。思叅則瞿然曰：「侵晨細雨霏霏，居亭力阻，予行子峻謝之。及放棹中流，忽憶艾先生及子，今在何所？」且手書其香兩字于冊。俄而風順，倏忽抵家。若非大主默啓，詰朝則無及矣。相與默謝。主恩出日抄舊藁，辱承叅訂。信宿而言別。嗣後余至東粵，覲二親，溯上游歸里，與艾先生及諸

友杳不相覲。然聞嚴子思叅果有溫陵之行。而先生則再入桃源。今且龍潯而僊谿矣。秋風正朔。每動懷人之想。乃有緘一篇示余者。亦題曰口鐸日抄。讀之知爲思叅爾。宣二子所續而紀者。屬小子彙而成書。余作而嘆曰。艾先生之入吾邦也。廿餘載于茲矣。諸凡燕秦齊楚吳越閩廣之鄉。足跡幾遍天下。其間玄言渺論。一往不留者。

不知凡幾庚午之春。主啓余衷謬興劄記之役。然特標所聞且見耳。其爲見聞所未經者。掛一漏萬。寧有窮乎。憶客歲晤思叅時。思叅卽雅存是想。乃懿好不孤。勝友朋起。復有爾宣顏子其人者。讀思叄之述。宛覩舊識。讀爾宣之紀。恍對新知。竊謬加詮釐。并拙述數帙。彙成一卷。庶無負二友。一片苦衷。且遍告同道。諸友之均有是心。

者。俾先生言言誘誨。並作津梁。語語箴規。
悉儲藥石。則吾黨幸甚。小子尤幸甚。

崇禎五年亥默涒灘之歲日在翼景教後

學其香氏李九標謹識

日鐸日抄目錄卷之三

答天神靈明與人不同故悖 主之罰特重

見一張

答地獄之悔非真悔

見二張

答天堂之樂不以私意變遷

見三張

答永苦之罰適與罪稱

見三張

答天主全智

見四張凡二則

論有過宜省

見五張

論候 聖神降臨

見五張凡二則

答擇地葬親毋惑堪輿

見七張

答擇日之謬

見七張

答天下萬民共出一祖

見八張

論人宜求止所而世爲僑寓

見九張凡二則

答事神之失真

見十張

論滌罪救人宜悚切

見十張

論求道乘時而貧賤反易

見十二張凡二則

論世福不足驚

見十張

論童子可教

見十張

喻修道之功宜早圖

見十張四

答堯舜有可學不得爲娶妾藉口 見十四張
凡二則

喻善惡係人自擇 見十
五張

論星無靈明而諸星度數不主吉凶 見十六張
凡六則

論聖教始難終盛 見十
七張

論神不可太用 見十
八張

論人子宜貽親以安 見十
八張

論存心之法 見十八張
凡二則

論道難遽信 見十
九張

論俗染深則人道靡易 見十
九則

論守貞

見二十張
凡三則

答事

天主非僭亦非褻

見二十
一張

喻入道貴勇

見二十
二張

論真悔必繇

天主起念且有畏愛之殊

見二十
二張凡

二則

論靈魂兼生覺之能

見二十
三張

答 天主雖在人心而愛惡行異

見二十
四張

論人立功愈崇受債愈重

見二十
四張

論 耶穌肉軀靈魂不離 天主性并釋三體

一

位之義

見二十五
張凡二則

答原罪爲罰之餘

見二十六
張凡二則

答人非善卽惡

見二十七
張凡三則

答用愛有三種

見二十
八張

答天主生神之意與神鬼之分

見二十九
張凡二則

論罷德助之生

費畧爲真父真子

見三十
十張

答地獄之罰有重輕

見三十
一張

答天堂之賞視額辣濟亞而不徒繇善功

見三十
一張凡

答神之三司愛欲爲功府

見三十
二張

答天主十誡刻在人心

見三十
二張



口鐸日抄卷之三

泰西思及艾先生口鐸

福唐李九標其香彙記

清漳嚴贊化思叅

分錄

溫陵顏維聖爾宣

溫陵張賡明臯訂正

清溪林爾元爾會

點定

桃源顏之復孔至

晉安羅天與太玄較輯

閏十一月艾先生時在桃源嚴子思叅自清漳祇謁
十六日問于先生曰天主之愛人甚于愛天神
乎先生曰何謂也曰吾人犯罪尚容悔改天神片
念遽受永殃故竊疑耳先生曰此有故也九品之
天神天主賜與極高之級超絕萬彙乃自恃忘
本輒謀僭逆此其受主之恩比人更重其悖
主之罪比人亦更重故天主就其初念遽定重
罰而人則別耳若論人之靈魂雖其靈明畧與神
同而神之明爲照明者人之明爲推明者推明者

一時不能盡徹。而能漸漸推之。故有初念誤執一
是。轉念推悟。而能悔爲非者矣。今日悞爲一事。明
日推悟。而能斷不爲者矣。夫人之本性。既能悔。能
改。故天主亦寬俟之。以聽其悔改焉。若照明者。
一時所照。一徹盡徹。則斷無轉念。旣無轉念。又安
有所悔改也。彼天神者。照明者也。旣明知。天主
而背之。故一萌傲念。輒握固不復置。而天主之
永罰。亦卽加之。而不復赦。此至公必然之理。又何
疑焉。

思叅曰。推明照明之說。旣聞命矣。敢問地獄之鬼。
萬苦難堪。豈無痛悔。若其有悔。可証能改。未知是
否。先生曰。此可謂痛悔其苦矣。不可謂痛悔其罪。
也。痛悔其罪者。出於愛。天主之念。念真罪卽改。
痛悔其苦者。出於畏苦。苦脫惡如故矣。思叅曰。化
以魔鬼之定於惡。其猶水之定于冷乎。水沸于鼎。
非悔其冷。難堪熱故。鬼痛于獄。非悔其惡。難堪苦
故。故觀去薪息焰。水冷如故。則知一脫魔鬼于地
獄。其不悔不改亦猶故也。先生曰。然。

廿二日先生燕坐思叅請曰。天堂之靈魂其樂有未足乎。先生曰。否。曰。孝敬父母非靈魂之德乎。先生曰。然。思叅曰。孝既靈魂之德矣。靈魂在天。父母之永苦者或有焉。能無痛戚乎。痛戚又不可謂天堂之樂。其義云何。先生曰。此其理。其情。其勢俱不容疑也。天主賞罰至公。決不待言。而在天之聖人。則又極知。天主至公之處置。而純合其旨者也。若有不安于天主之公義。斯悖理之甚。而悖主之甚者矣。天堂至德之人。豈容有之。且子亦知。

天主之愛人。甚于子之愛其父母乎。天主垂憫
下人。當在世時。旣寬恕之。又切誘焉。至死不變。而
後處以不得不然之地獄。斯時也。至慈大父業已
安之。爲人子者。寧有不順。大父之旨乎。況天堂
靈魂。非若在世日。尙容他感遷變。當時一見。天
主醉心于中。滿受無限福樂。更無轉向憂懼之感。
又何從入也。譬如海底之魚。四面皆水。而欲取微
火燃之。其可得耶。

少頃。思叅復問曰。百歲之人。其惡有盡。萬萬世之

永苦。其罰無窮。以無窮報有盡。毋乃已甚乎。先生曰。不然。天主至慈。其罰常不及罪。天主至公。其罰又皆與罪稱。何也。天主無窮至尊也。吾人至卑也。以至卑敢犯無窮之至尊。則一念悖逆。便應受無窮之罰。其需之年月。容其遷變者。此分外之仁耳。若論人行惡之事。雖似有盡。而行惡之心。實爲無窮。蓋人一息未絕。苟能悔改。吾主未嘗不宥之。如終不肖改。卽令久視萬載。亦將猶是。且將不止是也。夫人既有永不改過之心。則天主。

自。有。永。不。可。赦。之。條。此。如。衣。裳。長。短。適。稱。其。躬。何。
已。甚。之。有。

廿八日思叅復請曰先生向釋天主全知也曰已
往未來皆如現在敢問何以證之先生曰子嘗登
高臺而下瞰乎有已過臺左者有方至臺右者右
之視左非已往左之視右非未來乎乃自登臺者
視之何已往何未來而不同時俱見乎故無論人
言動之善惡天主日監斷不容欺卽我未言未
動時天主知已久矣可不戒哉

恩叅曰、信斯言也、化又有疑焉、夫吾人不有自專之能乎、自專之能雖、天主不強、則未爲之善惡、當亦天主所不知、何也、自專故也、今云天主全知若此、則似未爲之善惡、皆有前定、前定自專、不兩悖耶、先生曰、不然、余固言全知、曷嘗言前定也、前定與自專有相悖、全知與自專、則無相悖、何言之、譬兩人于此、翌日將與言一事、我深知其一之善、意其必聽也、與之言果聽矣、又深知其一之不善、意其必不聽也、與之言果不聽矣、不可謂

卷之三
王
我不知其聽不聽也亦不可謂彼不專其聽不聽也又何相悖之有乎。

越五年壬申夏四月艾先生再入桃源顏爾宣從初九日晚宿邸舍先生問曰今日攬轡之際亦有默想工夫乎爾宣對曰古人寡過未能竊有志焉先生曰過之難寡也如幽崖陰藪莫搜其伏若不猛力芟除其藏疾也多矣故省察之功甚不可闕

十一日抵桃源諸友畢會先生問曰明日是何瞻禮對曰聖神降臨日也先生曰聖神者仁愛之

火也。吾主耶穌升天時，遺命宗徒候聖神降

臨。至第十日，果有舌形如火，光輝射目，各現衆徒之首。頃刻間，頓發熱心，願布聖教于四方。且萬國語言俱不學而曉。今子等聞道以來，亦望聖神降臨我心者乎？雖然，非易易也。欲邀聖神之臨，必須齋戒爾心，澡雪爾慮，而後得荷。主祐焉。譬如一官長欲臨某家，其人不勝瞻仰也。數日前潔淨門宇，洒埽庭階。未也，更整治其堂奧焉。猶未也，必設幔張燈，奉香除道。以爲不若是，不惟失官長之歡。

且恐于官長之怒也。夫一官長之臨我室。且如是也。况聖神之降臨我心者乎。吾人能無妄行妄動。門宇之潔淨也。無妄想妄言。庭階堂奧之洒埽整治也。且復多立善功。增修好德。此其燈幔馨美。又何如耶。必被聖神歡欣臨格。無疑矣。

十二日 聖神瞻禮畢。先生詔于衆曰。子等曾整飭內宇。以望神火之臨乎。列品禱文有云。懇祈吾主。以爾聖神之火。炙熱我等心腸。斯言也。所當朝夕撫膺而求者也。蓋聖神仁愛之火。上天之神火。

也。卽以世火論之。火性上達。且炎熱光明。卽強壓之。未嘗不上升。而光熱未嘗少變也。吾人有此神火。忻勤向上。直達九玄。且內有其光明。而熱心頓發。其效寧可量乎。但神火之不我降臨者。以吾有邪火在也。邪火有三。一曰慾火。一曰忿火。一曰貪火。人有三火。薰灼其中。方且如燎于原。不可撲滅。而望聖神之嚮邇難矣。故必克除邪火。始可望神火之臨也。吾子勗哉。

十六日。黃賁宇問曰。聞先生素闡堪輿之說。則父母

之葬也亦不必擇地。遂漫然輕置之乎。先生曰。否。
人子果爲父母擇葬地也。擇一淨燥之區。毋使水
土親膚足矣。漫然輕置于心寧無歉乎。但今之擇
地者。非盡爲親也。直爲獲福計耳。過惑堪輿之說。
必求山之從何發龍。從何結脈。謂數年數世之後。
子孫昌旺。公卿輩出。皆由于此。甚且累年不得。而
親體暴露不葬也。豈不悖哉。

十八日。賁宇復問曰。風水之謬。旣聞命矣。尅擇之說。
有諸。先生曰。天主之成歲時月日也。三百六十

有五而成一期焉。何日見爲凶。何日偏爲吉。惟行
吉事。日日皆吉。行凶事。日日無非凶也。有人于此。
終身修善。迄無間歇。亦謂日時有吉凶。而吾行善
必有作輟乎。有人于此。擇一日焉。至吉無虞。而欲
謀爲不軌之事。無良之行。能保其不獲殃乎。當其
獲殃之時。方且訝然曰。吾向擇日。亦綦精矣。曷爲
而至此。是亦大可笑矣。雖然。此猶論凶事耳。今有
擇婚娶者。彼家曰。是日宜婚。此家曰。是日宜嫁。夫
一人擇之。未必詳。兩家擇之。不旣審乎。乃無子者。

有之。不相得者有之。未幾而卽鰥寡者有之。此曷以故。茲邑鄭思階者。初奉聖教。適爲尊人營葬。不擇日瘞焉。親舊怪其罔作。代爲之懼。思階不爲動。于今年餘晏然無恙。且荷主庇。舉一子焉。是非無用尅擇之一徵歟。

十九日。貢宇復問曰。天主之生吾人類也。始生亞黨厄娃二人。以爲原祖。然此二人生近如德亞國。或可爲如德亞國之始祖耳。縱相傳。亦傳太西一州耳。吾中邦離此數萬里。卽諸先生渡海。三年而

始至當初中邦羲農未生、未有舟楫、又誰生羲農諸人乎。抑或五大州各生二人以爲祖乎。敢請先生曰。按造物主聖經天下萬民其出一祖蓋

造物主肇成天地化生亞黨厄娃時天下一空虛世界耳。迨嗣續相傳人類繁興始分住他國。考中邦至羲農御世則已歷二千餘載。于時人類分析始及中土。故中邦之有人類大約自羲皇時始也。若以渡海而來無舟楫爲疑亦知如德亞國于中邦同爲一洲陸路相通不視敝邦更邇乎。故唐時

亦有德士至中邦傳。主教是其一徵已。即使必用舟而後渡。安知二千餘年之前。造舟不在神農先乎。又安知神農舟楫之利。非西邦祖製乎。中邦人未得造物主經傳。只知有羲農而已。未考羲農從何而生。故有此問也。

二十日。先生談經甫畢。適有友言世福肉軀之事。先生曰。吾人肉身。喻之驢馬。靈魂喻之主人。主人御驢馬。必鞭策之。馳驟之。及早。趕程。是晚。可獲安所也。若委轡而任其所之。則見甘泉美草而就食焉。

又何知前途之還奢也。彼時失所憑依。不幾主人驢馬俱兩誤乎。吾人不及時策勵。徒爲肉身計者。未知其後有何止所也。

又曰。生前世福。譬諸旅寓耳。今晚居停之所。棟宇美麗。雖堪娛目而快志。然吾能久居此乎。卽或牆頽壁陋。一時動履似若不適。而我亦不久在是也。今日暫處。詰朝行矣。嗟乎。人生寄也。死歸也。一世猶旦暮耳。富貴貧賤。亦僑寓之美惡耳。吾人永望。寧屑屑於此者乎。

甘一日，黃賁字復問曰、天主之爲萬物主也，必其

尊事之無疑矣。佛祖魔仙，則必共棄毀之，亦無疑

矣。然人家有火土之神，郡邑有城隍之神。天下國

家有山川岳瀆之神，此非

主命以分衛萬國者

乎。故舜望於山川，徧於群神。武王所過名山大川，

日惟爾有神，尚克相予，無作神羞。此非無見也，乃

亦誠人奉祀也。何故？先生曰、天主之生天地人

物也，各有神以護守之。故有護守人類之神，有護

守物類之神，有護守天地山海之神。不可謂無。但

人類則各有一神守之。非若他物，則僅有總守之神耳。乃謂之神，初不謂其有形也。舜武或識此意，故望之徧之，亦望其相予而護守之耳，未有所爲像而望之徧之也。未有求吉求凶而卽以爲主，而事之也。今人不察，乃有以人爲神而事，以魔爲神而事。修其廟宇，塑其像貌，朝夕焚香頂禮，謂禍福其所攸司也。是耶否耶？且勿論其爲人爲魔，不應以神祀之，卽真是神也，亦承主命而各受其職者耳，非其能自主張人物也。余不敏，嘗閱中邦史

書知前代舊弊各處城隍岳瀆皆有封號獨熙朝詔削之止稱某府州縣城隍之神造木主毀塑像其山川岳瀆亦去前代所崇美名只以山水本身稱之蓋以諸神受命上主原非國家名號所可加皇哉聖意可正千古之謬矣豈若今之衣冠而人鬼者哉知此則人家火土之神可無問矣廿五日先生由桃源抵龍潯張令公顏爾宣偕行中途稍憩時先生倦甚令公曰昨爲滌罪救人殊費神乎先生曰挾人吾欣爲之但人不肯自挾耳蓋

人非聖賢，安能每事盡善。有不善，不可不知。知之不可不悔。且解今人多謂無大過，卽有過求解，殊無痛悔。真切徒循虛禮耳。此其深負主恩，妄冀主宥乎？余當是時代，主權也不敢隕越，以干主怒。故費心提醒，欲牖其衷。庶令求解者動念悚切。况有一二語言未通，敘事失次。若非傾心諦審，亦難酌其罪狀。何異醫者按脈治病，以手印手，冀得其症而療之。稍有浮心，貽害匪細。諸人不識此意，又烏知余之費神哉。

廿六日到龍渾，問道者踵接。王暉宇獨後。先生問曰：「君春秋幾何？」曰：「已踰一甲子矣。」曰：「君知今歲後還有幾乎？」曰：「未知也。」先生曰：「前既往後未來，所可知者，只此瞬息耳。」日已過午，後路還賒，不早奮力以求啓處，恐作荒郊無聊客也。光陰迅駛，不啻川流之逝，人不及時聞道，虛度韶光，可不惕與。

廿七日，暉宇復入謁。張令公勸勉之。暉宇唯唯，曰：「聖教之當從也。余稔知之，但以貧屢累心，不免爲俗縡耳。」令公曰：「予以貧賤難從教乎？如子言古來聖

賢俱屬富貴家矣。不知聖教正甚。宜于貧賤不甚。
宜于富貴何也。富貴人沉溺已深。一時拯拔之。未
易起也。若貧賤則勞心苦形。磨練有素。其入道正
不甚難。譬之溺水者。身挾重貲。一溺卽難拯救。反
不如赤身無係。更便浮沒耳。請以斯言質先生。先
生曰然。

廿八日。暉宇又偕三友謁先生。論及世福。先生曰。夫
人終生營逐。不尋歸宿之所。皆爲世福馳鷺耳。不
知馳鷺。仍未必得。卽得也。亦多不全。繇來帝王以

迄士庶何家成全無缺。有財貨而無子孫。有子孫而無才能。有才能而身無安逸。有安逸而憂不能永年。種種此類抱愁終身。人顧營之而不能割。獨天堂一路萬福駢臻。乃不思到彼妄行取困。可不悲哉。

廿九日先生出訪客。令公陪行。適有二童子至堂。瞻拜主像。爾宣見其恬篤。贈聖教一書。先生歸。具告以故。令公曰。孺子更可教耳。人生少時。童蒙未牿。如新衣未經染垢。保護愛惜。可令永久常新。迨

有垢汚。又煩洗滌。不如新時。尤爲可愛也。先生曰。
昔吾主耶穌在世時與宗徒論道。適有數童子。
入堂而前。宗徒呼使去。吾主曰。毋阻也。吾所最
鍾愛者。他日升天。此輩獨多政。以此耳。

晦日。先生謂客曰。吾人在世。譬如士子在場。司文衡
者。寬假終日。聽其潛心注思。造作改竄。亦望羣才
之畢奏耳。迨納卷後。卽憑優劣。定去取。若文有不
佳。爾時更改無及。求欲再延晷刻。以便注思。必無
是理。我輩寄形宇宙。荷主恩。假以歲月。聽我改

過遷善焉。設若機會錯過。日月不留。主命一召。彼時亦似納卷時矣。善惡至此。關頭各分。偷一日之僞樂。失無窮之永安。洵可懼哉。

五月之朔。林太學邀請張令公顏爾宣陪坐。偶談娶妾一事。太學曰：「主教母行邪淫者。不可有外遇也。娶妾爲傳後計。亦在是例乎。」堯以二女妻舜。舜亦不告而娶。爲無後也。然則堯舜非與。先生微哂曰：「昨與令公亦詳及此。請轉質之。」令公曰：「不然。夫千古之大堯者。以成功。以文章。未聞以此大

之也。大舜者以其德、其智、其孝。未聞以此大之也。
帝妻二女，傳誠有之。然余未敢信其真也。誠真也。
余又未敢許其是也。然則法古聖人者亦法其盡
美而盡善者耳。今有人于此，謂之曰：爾可爲堯。爾
可爲舜。則兢兢謝不敏。乃此一事，獨往往藉口焉。
夫學堯舜，不學其成功文章。大智大孝，顧獨此之
學何哉。

爾宣曰：余有臆說焉。二女之稱，烏知非所稱第二
女乎？後世不察，誤傳爲二人，未可知也。且娥皇女

英烏知非一人名。誤分爲二者乎。世世傳訛。遂爲娶妾者作話柄耳。先生曰。噫。篡弑。藉口夫。湯武邪。淫藉口夫。堯舜。貿貿生民。大抵如是。嗟夫。

初七日林太學復邀先生于城南之樓。太學曰。去城西二十里有九仙山者。巖岫峻聳。木石玲瓏。間有大石。宛似人形。稍加雕琢。則成一尊菩薩矣。先生曰。然則珊瑚爲大聖人。不亦可乎。太學曰。何不可。之有。先生曰。總此石也。爲魔爲聖。未有定形。珊瑚。魔。則成魔。珊瑚。聖。則成聖。惟在匠人。不可錯下工夫耳。

夫人亦猶石也。孰爲罪人。孰爲賢人。有意爲舜。卽舜。有意爲跖。卽跖。亦隨人自爲。瑣瑣矣。

有間太學奉香于文昌君。先生哂而問曰。奉香將以求名乎。太學曰。老矣。無是心也。先生曰。然則何爲。曰。是神係上界之星。爲文章司命者。吾儒共傳事之耳。先生曰。夫文昌能爲文章司命也。則善于文章者。宜多成名矣。何以不然。而曰有命存焉。不可倖而致也。命者何非。主命而誰命乎。

太學曰。文昌不能司命。固然。然是上界之星。亦當

敬事先生曰夫上界之星亦猶人間之燈燭耳初無靈覺也旣將事星亦將燈燭而事之乎。

太學曰自來名臣將相俱言上應列宿故見星墜落則曰某方某將相死此又何以說焉先生曰信如斯言從古名將大臣凋謝者不知幾千萬人將天上星亦墜落殆盡矣何以古今星數並不少減也

衆友默然良久曰師論誠是但聖教書中所云景宿告祥三君覩耀又謂何先生曰星猶火也向旣

言之矣。所云景宿告祥者，蓋天主降生時，特以星光示人，有天神導之，非星自有靈也。譬如國君蒞朝，必先有燈燎前導，豈得以燈燎爲有靈乎。

太學曰：如是，星辰亦一物耳。太史觀象占星也，何爲？先生曰：占天象者，占歲之豐凶，時之寒暑，或風雨，或晴陰，亦理之所有耳。故毛詩有云：月離于畢，俾滂沱矣。卽孔子亦觀星而備雨具也。

太學曰：敝邦前年有金星見于南斗，識者謂刀兵之兆，厥後果遼東有變，則占星而知吉凶，寧盡誣。

耶。先生曰。夫有刀兵之災。謂必金星見斗。余入中
邦廿餘年矣。何年無兵。何處無變。不是滇南江右。
便是山東薊北。豈俱占星而預知乎。

少頃。衆議建堂之事。因曰。聖教之正也。人人知之。
聖教之行也。人人難之。甚矣邪之中人深乎。先生
曰。譬諸草木。邪教易誘人。如賤根蔓草。其興也勃
然。正教之行也。如喬木巨樹。必歲月久而後長殖。
然其底覆也。則已多矣。

初八日。先生同令公訪客。偶至駕雲亭。俯視溪中競

渡令公問曰。精脩君子。亦寓目此乎。先生曰。無傷也。昔聖若望。名聞四達。人慕而往觀之。時若望方食後。偶執一禽以舒懷。其人竊訝。若望知而欲醒之也。因其負一弩。借張焉。久而不脫。其人懼弦之斷。曰。物不可久張。久張則絕。若望曰。子知之乎。神不可太用。太用則憊。其人方悟而就教。令公曰。然則游藝之功。夫亦有道乎哉。

初十日。柯楨符入謁。求爲其子領洗。其尊人尚未入教也。先生語之曰。子自聞道後。孝敬父母一誠。亦

有加乎。對曰。有問其如何也。則不知所對。先生曰。
人子之於親也。奉養定省而外。誰不欲貽父母以
安。忍置父母以危。夫安孰安於升天。常生者乎。危
孰危於沉淪永苦者乎。今子已知生死大事。忍不
以告而親。卽告之而不苦。勸其依主以免永殃。
區區縟貌。亦無間矣。

十八日。郭郡丞問道于先生。時林太學在座。郡丞曰。
貴教存養工夫。誠爲嚴密。余竊慕焉。但如心之易
馳。何先生曰。心非易馳也。我放之而令其馳耳。倘

瞬存不放時操勿逐又安能遽逸哉

太學曰操心勿放固矣但不能却絕塵紛時應酬俗務不免爲其所用可奈何先生曰所謂常存此心者非謂漠然不動也夫心自有專主時時運用時時提省可矣卽爲世情所用亦一時借之耳非贈之也故事畢依然復存若任其紛逐營營無已是心反贈世情去矣安望其能存乎

二十日先生過林太學家偶談西國奇器太學曰昔祇謁於桃源見示貴邦遠鏡視遠若近視近若遠

歸述之。未有信者。先生曰。貴邑離桃源幾何。太學曰。纔一舍耳。先生曰。夫以一舍而遙之隔。以君鄭重之人親見之事。述之親友尚有疑心。何況余輩自泰西航海東來。涉程九萬。歷歲三秋。傳千古來未經見聞之事。而人有能遽信遽從者乎。太學嘆曰。先生言是也。

廿五日駕適仙谿。獨顏爾宣從居三日。問道者不乏。着意奉教。未有也。爾宣請曰。可以行矣。先生曰。世俗陷人。有如陷井墜其中者。奮拔未易易也。西有

寓言曰。昔羣蛙聚於壑中。相喰相沫。壑竭而蛙出。
復徙他壑。水竭又出。後至一井。俯視其水。茫然也。
欣然欲下。一老蛙止之曰。緩圖之。夫我向在壑中。
也。水盈則住。水涸則移。猶能無繫。今若落在井中。
一下無復出矣。且奈何。今人染俗未深。轉移入道。
猶易。此亦在壑之蛙耳。如已墜世俗之井。欲其望
道而躍。是豈旦夕之功哉。

廿九日陳廣文造訪爾宣陪坐適有一婦人覩服突
至爾宣俯首有頃廣文問曰向者婦人突至君觀

之乎。爾宣曰。不敢。曰。毋乃以先生及余在乎。爾宣曰。非也。以二先生在而不敢者。恐人見而議我也。若獨處而敢者。獨不畏。主知而譴我乎。抑畏人甚於畏。主或。主譴不若人非乎。

廣文曰。斯言有理。但不妄想而徒觀之。無傷也。爾宣曰。磨不磷。涅不淄者。聖人也。不善不入者。賢人也。况余非賢人。保不亂吾意乎。昔聞之先生曰。人之五官。譬如城之五門。啓閉以時。盤詰加謹。盜賊無自而發。若稍寬縱。一旦奸宄竊乘。制伏未易易。

也余承師訓、敢不服膺、

廣文問先生曰、此顏君嚴守法也、若老先生則不用如是、先生曰、昔敝邦一賢士、同衆人在席、偶有美婦過前、衆不敢視、賢士熟觀之、凝然也、衆人訝且駭、賢士觀久而哭、衆更大駭、賢士曰、吾觀此婦、櫛沐齊整、根髮無遺、且艷粧淡抹、費幾許工夫、所必然者、亦欲取憐於人耳、今吾此日、未曾用工、以取憐於吾、主不反出、此婦人下乎、是以有感而哭也、嗟乎、色慾迷人、有情不免、如賢士者、雖偶相

金言 卷之三
值而觀不惟不以動心且因而感勵其志矣。

廣文復問曰天主當敬予稔知之但竊有疑者天子祭天地諸侯祭山川大夫祭五祀士庶人祭其先今貴教家家供奉天主不亦僭乎况士庶之家螭居蓬戶亦必供奉主像毋乃太亵耶先生曰祭祀與奉事不同夫郊社之禮在中邦非天子不舉重其事也彌撒之禮在聖教非鐸德不行重其職也若所云奉事者爲天主生天覆我生地載我生神守我生萬物以安養我種種大恩何人

不日受何人不思圖報然則朝夕瞻依奉事亦聊
盡感酬萬一耳豈日祭之云乎豈日僭而襄之云
乎

六月廿有七日艾先生賁余鄉鄭文學晉謁余曰鄭
子雅志向道顧謀之家人反爲所阻先生曰人生
猶泛海也卒逢舟漏有岸可登其毅然先登於岸
乎抑徐徐然商之舟人而始決乎吾知必奮勇先
登不惟自脫於難反可拯舟中之溺若必遷延而
徐商之其不羣胥淪墜也幾希

廿八日瞻禮甫畢先生詔衆於堂曰滌罪工夫全由痛悔然所云痛悔者必自天主發念始爲痛悔之真何也凡人稍自好者一遇過愆鮮不知悔乃或爲蒙惡名或爲失財帛或爲損身命斯其悔也徒俗情之所致于上主無與是未可得赦也惟自天主而發者思已所犯罪過種種皆得罪天主痛悔求宥乃爲可貴已

又曰卽自天主而發亦有兩念一曰畏一曰愛畏者懼已得罪天主必爲主所罰故兢兢求

赦不暇譬。如僮僕有過。懼其主之撻之也。因懇切求宥。是亦僮僕之畏耳。愛則一片真摯之心。不忍稍犯。主命萬一有過。縱主不我責。而我且無地可自容者。譬之子事父母。一有違忤。卽父母憐不加責。而子且痛悔求赦。必得親心而後卽安。夫自天主一也。由畏而發者。僮僕之懷也。由愛而發者。孝子之心也。子等其奚擇焉。

日已晡。先生詰余曰。人身之魂有幾。對曰。有三。先生曰。云何。余曰。靈魂其固然矣。且復生長能知覺。

是復兼生覺二魂也。先生曰。否。否。人之魂只有一。
靈魂是也。其復長大能知覺者。乃兼生覺二魂之。
能非與生覺二魂並列人身而爲三也。譬之錢焉。
有銅錢。有銀錢。有金錢。銀錢能兼銅錢之價。非銀
錢之中。有銅錢也。金錢能兼銀銅錢之價。非金錢
之中。有銀錢銅錢也。明乎此。則知靈魂之能。特兼
生覺二魂之能。豈靈魂之中。復有生覺二魂哉。所
以然者。凡物貴能兼賤。而賤不能兼貴。譬府能兼
縣之事。未有縣能兼府之事者。夫靈魂貴也。生覺

二魂賤也。則靈魂兼生覺之能。尤大較著矣。

漏下初刻。劉允銘問曰。天主無往不在。亦可云在吾心否。先生曰。天主雖無往不在。然在善人之心。與在惡人之心。大不侔也。何則。善人之心。時敬畏。天主愛慕。天主終日乾乾。求所以翕合主心。故天主亦常在其心。如慈父之撫肖子。時親愛而啓掖之。若惡人之心。則不認有主。多方悖逆。縱吾主亦在其心。方且如嚴君之憲判。雖在而咫尺千里。又安得云在哉。

晦日諸友侍于堂偶及立會之舉。俞體高日比來立會悉某某之功。先生曰不然人之善勞皆由主非其自己有也。若天主稍不之眷自恃已力何功克濟乎。惟上主以恩賜人。人善用之則至慈。上主遂紀爲功耳。但我等立功愈崇受債則愈重。何也。譬有寢人于此。富者畀以一金。令其營運。其人果不負所托。富者復畀十金。而責重矣。若更能蕃息。直畀至百金千金。而責愈重矣。蓋彼資彌厚實。受債彌多。萬一不戒。驕奢淫佚。以虧耗厥。

資斯其負債。豈若一金之輕哉。

有頃林用籲以祭義請先生曰。耶穌之生也。以天主性接合人性矣。試問人性爲肉軀而天主性爲靈魂否。用籲曰。然。先生曰。否。否。人有靈魂肉軀。始成其爲人。故靈魂。肉。軀。二。者。只。完。一。人。性。若天主性。則純美至善之體。豈靈魂所可言哉。今吾主耶穌之生也。靈魂合肉身則生。而耶穌救贖而死也。亦靈魂離肉身則死。若天主性。則生。亦在。死。亦。在。亦。在。靈。魂。亦。在。肉。身。者。也。譬之劙焉。有

鋒有鞘。鋒鞘合而成劍。彼帶劍者。左手握鞘。右手抽鋒。似乎鋒與鞘離矣。然不可謂離于其人之手也。夫鞘猶肉軀也。鋒猶靈魂也。帶劍之人。則譬之天主性也。鋒鞘雖離。總不出一人之手。則知耶穌救贖。魂與身雖離。總不離天主之性矣。

又曰。且子亦知耶穌之身。固包有三體者乎。用顰曰。未也。先生曰。耶穌一身。有肉軀。有靈魂。有天主性。夫肉軀靈魂與天主性。三者不同體也。顧合而成耶穌之一位。試讀祭義所載三體。

位之妙正謂此也

秋七月二日林用籲延請余與其廸從用籲卽席問
曰客有難予者謂天主賞罰旣云于其身不于
其子孫乃一原祖犯命而罪遂流萬世而無窮斯
二說似乎相悖舊未知所對也先生曰賞罰于其
身者此賞罰之正也間有及其子孫者此賞罰之
餘也故夫原祖一犯命天主卽奪其格外之恩
逐出安樂之境矣若萬世傳染原罪此特罰之餘
耳譬如開國元勲必身受封爵而子孫亦可世世

爲王也。一大逆不道。必身服上刑。而子孫亦且累就死也。所謂于其身。不于其子孫者。爲中邦有不于其身。而于其子孫之說。故云然耳。然從古有開國元勳。不封其身。而只封其子孫者乎。有大逆不道。不戮其身。而只戮其子孫者乎。國法持平。端不如此。而况大主賞罰之至公哉。

又曰。卽所云原罪者。亦未可云天主之重罰也。何也。天主重罰人。必置之永苦之域。斯謂之罰。若傳染原罪。只得升天國。非有地獄之永苦也。

試觀孩童未領聖水。只不得升天。至長成爲惡。始墜冥獄耳。若肯翻然遵誠。則夙愆頓洗。天堂之樂。吾主曷靳焉。譬世祿之家。固宜世受封爵。自厥祖獲罪。一削其籍。其子孫特未免爲庶人也。何至幽囚爲伍哉。倘自能建功立業。則公侯將相。亦可當身立致。未有復以厥祖之罪。罪之矣。

其迪問曰。天主之賞罰人也。善者升天。惡者墮地矣。若彼無善無惡之人。天主將奚處焉。先生曰。人之無善無惡。獨孩童爲然。及稍有知覺。非善。

卽惡未有中立于不善不惡之間者也。

其迪曰。今有人于此。不偷盜。不邪淫。亦不妄證。可稱無惡矣。但不欽崇天主。是亦無善。先生曰。子亦知子道乎。今有人子于此。不狎邪。不賭蕩。不嬉遊廢業。斯亦可稱人子矣。但于父母壽不慶。疾不問。晨昏罔相聞。其子方侈然自多日。吾不孝也。與哉。彼爲其父母者。亦樂有是子否。吾恐不事父母。決難逃。不孝之辜。不事大父母。決難逭。爲惡之罰。蓋根本旣失。餘無足觀。人安得借無善無惡以自

文也

其迪曰。知主不事。罪固不赦。然有未聞聖教而力行善者。則如之何。先生曰。雖然。若有于已所知之善。能盡力行之。卽于聖教或有未聞也。大主亦必憐而救之。斷不負斯人之善念耳。

初七日。先生駕發邑治。林用籲從。晚宿方園。用籲請日。聖教之愛人如己也。僞已知之矣。敢問愛有不同乎。先生曰。有利愛。有情愛。有仁愛。用籲曰。何謂利愛。先生曰。愛有因已而發者。謂之利愛。是因

彼人有利益於我。而後愛之者也。此愛卽惡者亦有之。愛有因。人而發者。謂之情愛。是因彼人爲我之親戚故舊。而後愛之者也。此愛卽愚者亦有之。惟愛因。天主而發者。謂之仁愛。蓋已與天下之人。皆天主所生。旣愛天主。安有不愛主所生之人。故仁愛者。必合天下極疎極遠之人。而皆愛之者也。此愛惟聖賢能之。之三者。雖均謂之愛乎。而公私大小之懸判。若天壤矣。聖教所謂愛人如已。則惟取仁愛行之。而情愛未嘗不包。若利愛。

則直夷然不屑者也。

十六日余問先生曰天主之生神也云司天護守各有職掌夫以全能天主業無所不能必生神以供使令也何爲先生曰天主之生神非以代已勞也尊卑之勢然耳何也人世之主智能有限必置公卿百執事以補其不及若造物主全能豈固待諸神之助哉亦以尊卑之體必合衆卑而成一尊故生無數天神分爲九品羣崇奉而翼戴焉譬世主居臣民之上必置而公孤卿貳以及庶

僚而爲君者始尊。否則一人孤立于上。無有崇奉翼戴。又何以明天子之尊哉。

余曰。聞天神初生時。天主賦以性體。皆極精美。又云或善或惡。聽其自擇而率循。豈有精美之性。而善惡正邪。尙有未定者乎。先生曰。天神之性。原皆精美。然必置之善惡岐分之際。令其發念自擇。始可以賞罰隨之。如性皆精美。卽令定于善而無惡。則爲善皆天主之功。彼天神何功。而得享天上之永福哉。惟旣賦以精美之性。又必聽其自擇。

故發念善者適完其美性而得永賞。發念惡者頓失其性之美而得永罰。此天神魔鬼之攸分也。

廿七日余借用籲侍先生析三位一體之義先生問用籲曰經言罷德肋爲父費畧爲子然則父子之名其借言者乎抑爲真父真子者乎用籲對曰生者爲父受生者爲子斯殆真父真子而非借言者也先生更問余對曰用籲言是但天王罷德肋之生費畧也原一時俱有非若人世父子有尊卑先後之殊耳故謂之一體先生曰然抑又有說焉夫

所云父子者必生其同類而始得名者也。若身有
蟻虱非不受生于人然不可謂之父子故必人生
人類而父子之名始立雖然彼人世之父子尚不
如天主父天主子之爲眞也何則父之生子
也必全通于子子斯爲眞父而子之受生也必全肖
其父斯爲眞子今人世父子求其音容彷彿情態
畧同如是止耳若必通體酷肖無幾微毫髮之殊。
千古以來亦有前聞者乎乃天主則異是故夫

罷德肋之生費畧也內自照其本性全能大智

至善無窮之妙。而內體自生。一全能大智。至善無窮妙之像。而爲費畧。是其全能。大智悉通。體于費畧。而費畧均肖焉。渾然無二。斯其父爲真父。子爲真子。而其爲一體。豈人世父子所可同耶。

少間用籲問曰。惟彼世人不領聖水入教。且有所犯而不悔者。固皆不免永苦之獄矣。然有長厚自守。與禦人者同罰可乎。先生曰。同一囹圄。而罪罰各殊。則同一地獄。而罪罰亦異。未有混而無別者也。

用籲曰。然則天堂之樂亦有分乎。先生曰。然。曰。生前善功之大小。足爲天堂受賞之券乎。先生曰。未足也。天堂之賞各因其生前所受額。辣濟亞譯言天主。

聖寵之多少。若徒有微功而無額。辣濟亞不得受也。

天堂之賞也。曰。額辣濟亞何由而得。先生曰。初賜時不由善功而得。旣賜之後。觀人仰應之。何如賜而能應。則吾主將加賜焉。故以此定額。辣濟亞之多少以爲天堂受賞之券者也。

用籲曰。仰應天主必在善功。乃謂徒有善功而

無額辣濟亞。何也。先生曰。人雖爲善。又要觀其爲善之意。意果眞乎。抑別有所爲乎。若別有所爲而爲善。則爲善之念不真。縱有善亦不得謂之真善也。卽不可以得額辣濟亞也。故天主之賞人善也。不賞其所爲。而賞其所爲。

用籲復問曰。靈魂有三司。日記含。日明悟。日愛欲。敢問何者可以爲功。先生曰。其惟愛欲乎。曰云何。先生曰。人豈無明知。天主而竟不發愛慕者。是記含明悟尚未足爲功也。乃有拙于記含明悟。而

獨篤于愛慕。天主者是愛欲之情超出記舍明悟之上而爲功之府者也。

廿八日其敘問曰聖教之入敝邦也僅五十餘年耳。前此罪惡之人固宜受地獄之苦至若飭躬脩行如敝邦所稱賢聖者乃於十誡尚未盡符。天主何處焉先生曰天主十誡刻在人心天下皆已知其槩果以其所知而恪然遵守者縱經典未傳情亦可諒。天主必憫而祐之或默啓其衷或令人傳授以全其德斷不負其恪守之誠也。如中邦

諸賢真能如是。則天主亦必俾之安所矣。雖然。
前此尙得言不知耳。今數十年來。闡發有人道猶
大路。彼明知而明背之。咎將誰譏耶。



口鐸日抄卷之三 終



口鐸日抄第四卷小言

隙駒如駛。歲月不留。返顧年來。茫無寸得。
雖渝糜不律。謬叨劄記之司。然而塵思撩
人。如着敗絮。行荆棘道中。左支右拄。苦莫
可脫。安得時聞德音。可以破空而走也。壬
申之七月。盧先生忽棄人間世。捧誦遺言。
邈不可復。攀戀之私。何能已已。而艾先生
則又自莆而泉漳。而江右。且重有富沙之

行向日鐸音幾成曠響矣何幸林先生不鄙夷時辱函丈而誨之其所以嘉惠小子者三先生如一身也今秋闈事正迫重晤思叅復承數簡見示余愧且謝曰夫照乘之珠藉以赤玉之盤則輝光倍映識者咸欽其寶也若余則瓦缶耳雖愛珠之深不敢不出以相藉而其不韵也不旣多乎因受而踵成之彙爲四卷而思叅則勉余曰

艾先生有云。讀百言不如記一言。記百言不如行一言。余記且不文。行于何有。拜錫良規。其負明師益友數矣。無何。陳子孔昭。顧予邸中。曰。聞泰西諸國。常置一鐘于山之岑。人有怠厥功者。則擊而使醒。然而鐘則無功。故先生之視有言無行者。譬諸鐘。余思是役也。蜚播洪聲。行將聒耳。乃返躬實課。曾百不得一焉。李氏之子。其猶鐘乎。

雖然鐘頑質耳。既不任功于何任責。獨怪吾黨身負靈才。深荷上主之畀。顧有口無心。崇空言而鮮實行。皇皇臨汝。雖欲爲鍾也。其可得乎。此則余之所滋懼者也。故因四卷之成。而併志之。

崇禎六年昭陽作噩之歲長至日景教後學其香氏李九標謹識

口鐸日抄目錄卷之四

答禽獸之聲別于人因論聲有三種

見一張凡二則

答太極爲元質而非

天主故古人不祭太極

見二

張凡二則

答富貴貧賤之殊

天主原無厚薄

見三張凡三則

答人生而殘疾不可憾

主而有殘疾者之用

見五

張凡五則

答人之夭折皆可無憾而當感恩

見七張凡三則

論讀書之法

見九

論遠鏡有義

見九張

答肉身之復生

見十張

答元質有變化無增減

見十張

答銀錠之僞非所以事親

見十一張凡二則

答事呂純陽之非

見十二張凡二則

答謝主恩之頻

見十張

答怒之道歸于無怒

見十張

論奉主之心

見十張

論領聖體之益及領聖體之功

見十四張凡三則

論負荷 主命不苦難而反甘易

見十
五張

答神之三司亦有克兼

見十
六張

論記舍如庫藏

見十
六張

答邪念多人自萌非盡繇魔鬼

見十
七張

答天札皆 主恩并論赦罪之理

見十八
二則張

答人易犯罪乃原罪餘跡

見十
八張

論人之善勞悉繇

天主

見十
九張

論人之五官借之

天主

見十
九張

論 天主在天之義

見二
十張

論 斯彼利多三多不可謂 耶穌之父并答其

與降孕之功

見二十張
凡二則

答 天主三位不可缺一

見二十
一張

論聖多默異蹟

見二十
一張

答靈魂無男女之殊

見二十
二張

答出言有道

見二十
三張

論痛悔異于動悔并析痛悔二字之義

見二十三
張凡二則

論 天主三位一體有生發二義

見二十
四張

論人蒙 主赦宜體以赦人

見二十
五張

答記舍只靈魂一職而有少壯老之殊

見二十六
張凡三則

答睡夢之幻

見二十
七張

論無德之人終爲

主棄見二十
八張





口鐸日抄卷之四

思及艾先生

泰西

口鐸

存元林先生

福唐李九標其香彙記

清漳嚴贊化思叅分錄

清溪林爾元爾會

點定

晉安陳克生孔昭

同邑林一雋用籲叅訂

弟 李九功其敘較輯

越六年癸酉春王二月艾先生有清漳之行從嚴子思參請也朔後五日思參問曰聞貴邦精格物窮理之學故鳥獸之聲皆有其字不知亦能洞其語言之意否先生曰子欲通禽獸之意亦知人禽之聲之所以別乎敝邦格物家以鳥獸之聲爲自然性然之聲凡有知覺者皆然如驚恐則啼咷悲痛則哀號沓聚懼樂則呼群而唱和凡此者普天下各隨本類不須教習生而固然皆發于覺性之本情不能有二者也若人則爲擬議之聲人有自專

之能。故均一人聲，而安排分配隨方不同。此非能推論理者不能也。今欲知鳥獸之意，當先別其聲爲自然性然之聲，則知百千變態。不出喜怒哀樂等情。如赤子之啼嘻，聞聲可喻以意逆之，鮮有不中矣。

又曰：大凡聲有三種。有有聲而無意者，風雨笙簧之聲是也。有有意而無安排擬議，同類之所必同者，鳥獸之聲是也。至于有意而復有安排擬議，雖同類而彼此各異者，則人之語言是也。識此三種，

金言 卷之四
愈知人禽之聲之所以別已。

初八日，鄭孝廉邀欽卽席問曰：敝邦六經中，具言事

此上帝非一氏之所云上帝也

上帝祭上帝不聞有事祭太極者，則太極殊非天

地之主矣。今按易經有太極生兩儀一語，又似天

地受成于太極者。先生曰：天地間凡可舉之物，必

藉四所以然而後成。一日質，一日模，一日爲，一日

造者，如彼几甕焉、材木爲質、高下廣狹爲模、所以

用以倚、用以坐、爲工、匠爲造者，四者缺一，必不

能成一几一甕矣。天地亦然，元質爲質，大小厚薄

爲模所以覆載于人爲爲 造物主爲造者今觀
儒者之解太極不出理氣兩字則貴邦所謂太極
似敝邦所謂元質也元質不過 造物主化成天
地之材料不過天地四所以然之一端安得爲主。
又安得而祭之事之也哉。

孝廉曰請問其詳先生曰元質之非 造物主其
理有四端一曰有始天下惟 天主無始凡物皆
有始元質也者 天主欲造萬彙之形故先造一
元質以爲之底則不得謂之無始一曰非自有天

下惟無始者爲自有。元質旣有始。則必受有于天主。而非自有。一曰。有邊際。無邊際者。天主之體也。元質之體。窮于形天以上。属于幾何。則不得謂之無邊際。一曰。非萬有之本。凡物之有形者。以元質爲本。惟形天以下。則然。若天神與人之靈魂。則天主自無中化成之。不關元質也。則元質安得爲萬有之本。噫嘻。人苟知太極之卽元質。又察此四者。而知元質之異于天主。則可通太極生兩儀之解。而古人不祭太極。其故并可見矣。

十有二日思叅請曰 天主吾人公父母也父母之
子子無偏厚薄今人有生而富貴者有生而貧賤
者種種不齊 天主何不比而同之以免人之怨
憾乎先生曰如子所言將同富貴乎抑同貧賤乎
曰富貴曰舉世皆貴誰爲興臺僕隸以養其尊舉
世皆富誰爲耕織制器以濟其用卽如一人之身
有司視聽者亦必有司持行者交相爲用固缺一
不可者也今使通身同生耳目將不成一人使舉
世皆生富貴將不成世界矣豈 天主全能之妙

用乎。

思叅曰富貴貧賤交資互益于理誠然但均之天主所生誰不願居富貴誰肯甘處貧賤彼此相企而憾生焉亦人情也故謂天主生人雖各有其用寧盡無厚薄其間者乎先生曰請問子所謂厚者厚富貴耶抑厚貧賤耶所謂薄者薄富貴耶抑薄貧賤耶思叅曰厚者必富貴薄者必貧賤矣先生曰異乎予所聞世所稱福非真福乃罪之媒也傲忿淫惰諸惡最易犯也世所稱禍非真禍乃

善之梯也。謙忍貞勤諸德。最易守也。故世有先富貴。卒奢侈而致貧賤者矣。亦有先貧賤。卒勤儉而致富貴者矣。有終其身粗衣淡食。而行同狗彘者矣。有終其身錦衣豢食。而行同狗彘者矣。有終其身粗衣淡食。而德貴金玉者矣。試取兩人之表裏之始終。而合計之。天主曾何厚薄之有乎。

思叅曰。窘窮益德。安樂滋尤。誠哉是言也。但思窘窮亦可爲惡。安樂亦可爲善。人故願爲其安樂者耳。先生曰。是何言哉。人旣知貧賤之中。可以益德。

則宜安承。主命矣。今乃曰。吾願爲富貴。吾願富貴而爲善。是其心毋乃不富貴。遂將不爲善乎。試問人人欲富貴。將使誰者爲貧賤乎。不願吾體。天主之意。只願。天主體。吾之意。不願。吾遵。天主之命。只願。天主遵吾之命。罪莫大焉。嗚呼。人生斯世。如俳優在場。所扮俗業。一時事耳。俳優不以分位高下爲榮辱。人乃不然。是其達識。反不俳優若也。亦獨何哉。

有頃。思叅復請曰。貧賤不可憾。旣聞命矣。敢問人

有生而殘疾者、則如之何。先生曰、吾人之生也、有
肉軀、有靈性。靈性賦于天主。人人完全無缺、肉
軀授于父母之精血。精血有損、肉軀亦因有損、又
何憾。主之有乎。

思叅曰、肉軀有損。天主何不于胎中變易之、以
全其美。先生曰、人損傷之。天主必變易之、亦非
當然之作用矣。惟其不變易之、以陰備厥用、正可
顯天主之全能也。譬如繪者方繪次、拙工攏筆
壞之。良工取彼拙筆、奏繪焉。更加妙巧矣。

思叅曰。人之安全者。天主或生以備用。若彼疲癃殘疾之人。化未見其有用也。先生曰。昔聖亞悟斯丁有云。人入工匠者之家。見其造作之器。或直或曲。或利或鈍。或完成。或剝缺。種種不同。初雖不諳其用。然莫不私自想曰。彼必有以用之。豈其無用而置此。今者入寰宇之中。見造物主生人。或安全。或殘缺。一不明其用。遂疑造物主將無所用。是何信主。反出信匠人下哉。

思叅曰。敢問殘疾者之用。先生曰。子疑其無用。亦

知其用固甚顯者乎夫斯世者吾人立功修德之
世也有疾苦然後有忍疾苦之功又因而有賑恤
疾苦之德是利己利人之資莫切于疾苦者也聖
亞悟斯丁有曰除疾苦于世者是除哀矜之行于
世矣旨哉斯言良可繹思已

思叅曰師言誠是然人之五官亦爲善之具也今
或缺而不全毋乃其具亦缺乎先生詰曰何爲三
讐曰肉身世俗魔鬼先生曰子旣知肉身爲讐之
一則知靈神與肉軀體最親情最異也神喜理身

喜欲恒爲讐敵。今缺一官靈神未嘗有缺而已先免一讐矣。烏知非大幸也者。昔有德士病失一日故有兩讐。今去其一。天主之恩也。夫德士以失目爲造物主之恩。人乃以胎生之疾憾主。非惟不知恩。其獲罪亦甚矣。

有頃恩叅復問曰貧賤殘疾人之所甚苦也。如先生言非惟不當憾反宜感恩焉。竊思夭折之人受生未幾遽墮厥身方彼二者罹凶尤甚不知所以慰之先生曰人之夭折有三故皆可無憾。夭折之

人有三等皆當感。主恩恩叅曰。何謂三故。曰。父
母之稟氣一也。調攝之善否二也。造物主相人
之善惡增之減之三也。斯三者將誰憾乎。

日。何謂三等。曰。一爲善人。善人。天主之孝子也。
豈有孝子喜于久淹逆旅。不願速回本家。而見其
父母乎。其使之早離苦世。而享天福。是天主之
恩也。一爲惡人。惡人在世。爲日愈多。罪過愈重。少
一日。是少一日之罪也。卽入地獄。亦可少減其苦。
是非。天主之恩乎。一爲無善無惡之孩童。孩童

命終領聖水者卽升天國縱未獲領亦得靈薄之所。詳見本論視彼久視斯世卒墜永苦之域者其受恩不亦多乎故曰皆當感恩也

又曰凡物一受生于天主卽屬莫大之恩故雖無生長如天地四行無知覺如草木花菓無靈明如鱗介羽毛一旦受有其荷主恩比于虛無已不可倍數况人受造物主之賜得以爲人且片刻受有永世不滅是雖一胎天之魂其荷恩之重比之天地不靈之物又萬萬矣感當何如哉思參

謝曰。至哉先生之教我也。質言罕譬。雖至愚者醒矣。自今而後。敢不素位而行。以承主命。

廿有五日。瞻禮甫畢。先生謂嚴剛克曰。祭義一書。亦諦閱否。對曰。然。先生命述一二。則多所不全。先生曰。聖教之書。義理深長。非如他書。可以涉獵得也。日取數帙焉。反覆玩味。必使胸中恍然有會。確然能記。而後已焉。故時遇同道諸友。述其所得。不遺不棄。是可益己。而兼益人也。若徒誇多闢捷。不深理會。雖日盡數卷。掩卷茫然矣。卽對人言之。安能

井井無漏者乎。此如以一桶之水。亟傾石上了無所入。濕而已。嗟夫。我有斗米。需徐盡之。乃得其養。若徒以飽一餐。不獨胃不能受。反得傷焉。聖教之書。靈性之糧也。其食飲也。亦正如是。

三月二日林有杞入謁。求觀遠鏡。先生曰。子何鏡之觀也。有視至九重天而止者矣。有透九重天以上而視。天主無窮之妙理者矣。孰遠孰近。二者奚擇。有杞曰。視天主之妙理者。其人之心鏡乎。數日來。幸從先生講解經旨。頗窺天外理矣。今願假

視形天者一寓目焉先生出示之正觀則極遠之物皆近而大倒觀則極近之物皆遠而小有杞異之先生曰無異也身後之事世人以爲極遠不知其至近而所係之大也眼前之事世人以爲極近不知其至遠而所係之小也有杞正容曰先生教我矣

初八日艾先生談經及肉身復生一款客有疑而問曰天主全能旣能于無中生有其復生諸人固亦無難但思久死者肉身消盡業已無遺矣謂

天主另造一身則可。謂其本身復生。則所未解。先生曰。人死雖久。肉身雖消盡。其肉身之元質。變變化化。總不出天地之間也。天主以其全能。聚而合之。使之復生。亦何煩另造之有。且另造一身。非所謂賞罰之公者也。何也。初立功犯罪者。一身。今受賞受罰者。又一身也。虧有功而賞無功。遺有罪而罰無罪。豈大主至公之旨哉。

先生退。思叅請曰。元質有增減否。先生曰。有變化。無增減也。思叅曰。余觀木質變而爲炭。炭質變而

爲灰漸變漸減幾鄰于無相彼蠟燭舉火燃之移時而盡其質安在先生曰木變爲炭所存之灰其土分耳且或變爲火或變爲氣或變爲水者矣蠟燭之變不盡屬土質其質安在在火氣也蓋凡天地間物以四元行結而成體者其變化復歸于四元行焉故曰有變化無增減也

十四日客有問先生曰聞天主十誡有孝敬父母之條又聞禁人燒銀錠曾一綻之是惜也何云孝敬先生曰敢問子誑其親謂之孝敬可乎曰不可

日、父母在日、嘗用牲醴之養。死不忍忘。故中邦薦之。所謂事死如生。事亡如存。以表其孝敬之心也。乃至所獻金銀。非綴造之者乎。若爲人子者。當父母在日。獻以綴造之金銀。父母必怒而責之。以爲誑我也。今者親沒。而遂獻之以此。則是忍子死其親。而敢于誑之也。其不孝敬亦甚矣。

客疑未釋。先生又語之曰。今人之孝敬父母。比于三代以上之賢哲孰愈乎。客曰。不能幾及耳。何敢見少。先生曰。秦以上未嘗有紙。三代之祭典並未。

聞用紙。吾子苟不存乎見少。又何用喋喋爲客。唯而退。

潭有立脩真會者。以呂純陽爲宗。十六日。有彼會士來謁。問先生曰。敝會教規。分有功過格。每朔望向呂祖師焚之。亦教人爲善意也。先生以爲何如。先生曰。省察功過。固屬善事。但思人之有過。果獲罪于誰。則有過而求赦。亦將求赦于誰也。孔子曰。獲罪于天。無所禱也。其意云何必以吾人苟得罪于天地之大主。則自天地大主之外。更無處可求。

赦耳。今者省已之過，而告于純陽，何從得赦。反增不識主之罪矣。烏乎可。

客曰：敝會亦嘗拜上帝，是非不識主者。先生曰：認主不真，敬畏不篤，祈望不殷，偶爾一拜，亦良知所動耳。且彼佛亦拜，仙亦拜，三教亦拜，何處不拜也。志向不定，于一真主，功行到底，無成。譬如泛海而無指南，隨風漂泊，茫無定向，何能到岸。坐見沉沒而已。

先生之燕居也，恒自言曰：謝大主之恩。是日思

叅請曰。化侍先生以來。聞斯言也。不知凡幾矣。敢問何謝恩之頗也。先生正容歛手曰。人時時受大主之恩。可不時時思所以謝之乎。况能時時謝主恩者。則時時更受大主之恩矣。思叅曰。謹受教。

是月之末。艾先生返駕溫陵。而林先生之入三山也。則匝一載于茲矣。廿有二日。余至堂祀謁。問林先生曰。怒之當克也。人知之。然有不得已而用怒。怒亦有道乎。先生曰。可怒而怒。怒亦無傷。然所謂無

傷者怒其過非怒其人也故外雖有怒之形而心體漠然不動譬如雲霧半空而日光不損雷電交作而天體自如斯有怒而總歸無怒者已

廿四日林先生詔于衆曰吾主升天期近矣子等

亦思所以奉獻吾主者乎夫吾主所甚愛于人者豈其財物之謂哉必奉以真摯之心乃爲可貴今有一種不痛不癢之心此直頑如石耳否則而爲悠悠忽忽之心此又冷如冰耳卽如贈人以物必思所以當其歡心若徒奉石與水焉其人鮮

不艷然怒者也。矧以頑如石冷如冰之心。而奉獻
至尊之。上主者乎。

廿五日諸友求領聖體林先生曰阨格勒西亞譯言
教會中命吾領聖體者何意乎斯其益有三不可
不知也一曰愛愛者天主加愛于吾身者也。
蓋凡人相愛必有物相遺以章其愛今天主之
愛吾人也不惟日保存安養之且并其至尊至貴
之身亦畀以予我愛孰大焉。一曰表表者吾主
之加愛乎我亦以立愛慕之表欲吾倣倣之而愛

慕天主。與夫愛人如己者也。一曰養。養者五穀以養肉軀耶。耶穌聖體以養吾之靈魂。但五穀之養人也。必化爲人之精血。始稱爲養。而聖體之降臨也。必與吾之靈魂渾合而爲一。何養如之。

廿六日林先生坐論于堂。曰。子等將領聖體。宜默想三端。其一。思來者。何人。此吾之師也。吾之主也。師者。時啓迪之。教誨之。非吾師。則人心晦蒙矣。主者。則又人所倚賴其安養者也。此如一家人之靠其家主。凡飲食衣服。咸仰需焉。卽吾主之告宗

徒亦曰爾稱我爲師稱我爲主我真是也夫曰師
日主是尚可輕乎其二思來者何家天主以至
尊至貴之體乃降于至卑至賤者之身。此如家主
極其尊貴一蒞僕隸之家若不潔除脩飾獲戾必
重則又何敢以穢濁未浣之身而漫邀吾主之
臨也其三思來者何故天主尊矣何爲降此卑
賤者之身可見天主者原至仁至慈之上主其
惠然降臨者所以赦人之罪增人之德而加以額
辣濟亞者也夫天主之恩若此子等宜何如愛

慕圖報。以無負。主恩者乎。

又曰。圖報之功莫如仰體。然卽主字之義。而可推也。譬如人世之主。君臨一國。則凡一國之上。自公卿。下迨士庶。其遵憲法而罔敢違者。無論貴與賤也。今吾主旣降臨吾身。而爲一身之主。則凡一身之上。自頭目。下迨手足。有敢不遵循規誠。而違背。主命者乎。故必目毋妄視。耳毋妄聽。手足毋妄持行。悉翕合。上主之心。乃可已。

廿七日。林先生又謂衆曰。夫所謂主者。亦猶加規誠

之輶輶于服役者之肩背。此其負荷甚重。人未有不爲苦。且難者。而孰知其甘。且易。何謂甘。一思吾主爲我等受難。被諸痛苦。則凡諸窘難苦勞。直欣然甘受之。更思吾苦勞日甚。德行日增。而天上國無彊之樂。直可梯以登也。愈勃勃其欣快矣。何謂易。今有物于此。我諉而不舉。深覺其難。如肯毅然舉之。則必有人左之右之。而難者易矣。今此負荷雖重。如我肯猛自擔任。則吾主必付以神力。如左手。然何易如之。

夏四月二日林用籲問曰向聞之艾先生謂人有善記含者未必善明悟有善明悟者未必善愛欲是神之三司亦有不克兼者也林先生曰雖然若夫明睿過人之士亦有能兼之者何則蓋人之記含既精從此義理純熟則靈光頓發而明悟生焉既明悟此理自欣欣勃而行之是又從明悟生愛欲者也然此必大過人之士始能兼之故神之三司有能兼不能兼之異耳

又曰記含如庫藏焉爲義理藏納之府者也故記

舍之司必純而不雜。凡耳之所聞。目之所接。必其皆合于理道者。而舍記于心。自此心之所悟。皆諸美好之物。而愛欲亦無有乖于道者矣。否則邪正雜陳。好醜並儲。無論兩者不相容也。卽當真正用功之時。亦有別念竄入者。大抵皆記舍之不清也。假如庫藏所貯。悉皆金玉。絕不令醜且賤之物雜其內焉。則凡心之所識。取而用之。莫非純金美玉者矣。

初四日。余問先生曰。人有邪念。聞悉由魔誘。果爾。則

罪在魔鬼。不將爲人釋咎耶。林先生曰。非也。人有百千萬念。悉人自萌。魔鬼特從旁煽之耳。煽之而不動。則爲人之功。煽而輒動。則爲人之罪矣。雖然。吾主之升天也。業繫服諸魔。不令爲人害。人之被其誘惑者。由近之而不知遠耳。卽如不義之財。非禮之色。皆魔鬼所伏藏。我一見之而卽遠。魔能肆其毒乎。惟夫見利而生貪。見色而畱念。斯爲魔所誘而莫之覺。故曰。魔鬼如繫狗焉。近之者必爲其所噬矣。

其所噬矣。

五月之中林先生費余里十有九日翁允鑑問曰人之生死悉由天主夫人知之矣今有孩童始生未幾而輒夭札則大主之生是人也不亦徒然乎先生曰此天主莫大之恩曷云徒然乎允鑑曰云何先生曰大主之生人也隨賦之靈性斯卽賦以升天之質者也故孩童一滌原罪縱夭札而死而其升天也更易於成人此孰非天主莫大之恩曾何虛生之與有

又曰孩童之領聖水也無俟痛悔蓋一經洗滌而

原罪已悉赦矣。若成人則必須痛悔以原罪之餘復造有諸罪故也。雖然人而痛悔已罪者一滌原罪。并諸罪俱可得赦。何也。原罪者罪之根也。自造諸罪者罪之枝葉柯榦也。故原罪一赦而諸罪并可悉宥。譬之樹焉。一拔其根而枝葉柯榦有頽然畢起者矣。

余問曰。根株拔。則枝榦宜不復生。乃有原罪旣除而罪宗復踵至者爲何。先生曰。今有病人于此。傷入五內。其發之顏色者必黃而瘦。縱其病根旣拔。

非急滋補之。其色能頓復哉。今人原罪雖除。然一
自受染之後。其性不能無偏。此亦原罪之餘跡也。
故必猛力克治。始可無愆。故克之正。未易易耳。書
不云乎。克明俊德。可見德必克而始明。克之而其
明始俊。俊者美好之謂也。

廿一日。余謂先生曰。人之善勞。悉由天主。乃今之
聰穎能文者。多岸然自命。未有歸功于天主也。
烏乎可。林先生曰。子不觀之筆乎。責筆以書。而筆
不能也。求其善書者。必出于握管之人。至于揮毫

之際。字畫整楷。而筆乃傲然自多曰。此吾之能。而非握筆者之能也。可乎不可乎。

秋七月。林先生回三山。五閱旬矣。十有八日。先生詔于衆曰。人之五官。借之。天主者也。天主借我之意。但許我爲善。豈許我爲惡哉。且夫借財于人者。屆期必償以息。則借物于天主。其加息又當何如。故行德立功。所謂償。天主之息者也。設屆期而無可償。天主尚責以永罰。況挾所借之物。而反背其主者乎。

八月朔日劉伯秀受經于堂適余陪側林先生謂伯秀曰經云天主在天其義云何伯秀曰天主無往不在所云在天者尊之耳先生曰旣尊之在天則高高在上不視爲與人渺不相屬耶伯秀未有對先生曰夫天者吾人之本處所也所云天主在天者在吾之本處所也何也人生斯世直僑寓耳必刻刻豫還鄉之計焉一旦有急亦可備以無患故經首揭天主在天欲人知天主在吾本處時醒切而思慕之也譬如有人于此客于他

鄉、范不知返。旁有醒之者曰：爾之父母在爾家。爾胡不思。吾知其人必惕然猛省。所以豫爲還家之計者。惟恐後矣。

徐及信經三欵。先生詰余曰：費畧之降生也。云因斯彼利多三多之功。則斯彼利多三多。可謂耶穌之父否。余曰不可。曰何爲不可。曰特因其耳。故爲不可。先生曰今人之生也亦因其父母而生。則因之一字。寧定論乎。余謝不敏。先生曰。凡人之稱父子者。必分其父之血脉。通之于子。斯爲

真父乃聖母之孕耶蘇也只聖母自有之淨血聚而成胎特藉斯彼利多三多之神功耳是豈分斯彼利多三多之有哉故不可以謂之父。

余曰天主三位既俱有全能則費畧之降生也奚不可自爲而顧藉斯彼利多三多之助耶先生曰斯彼利多三多亦是一位天主豈有費畧降生爲救世大故而斯彼利多三多獨漫無所事事哉故亦必用其神功俾聖母成孕始

爲斯彼利多三多莫大之恩已。

伯秀因問曰、天主至尊只成一位奚不可、而必待三耶、先生曰、一尊之中、自然包有三位、缺一卽不成、天主矣、譬之人性焉、有記、有明悟、有愛欲、斯三者、固人性所應有者也、缺一卽不成性矣、又奚疑于天主、

初三日、余謂林先生曰、頃讀宗徒行實、見諸聖之致命者、多種種靈奇、吾師身歷諸國、夫亦有異聞乎、先生曰、彌撒大禮、必以蒲萄酒行之、此定規也、然

蒲萄爲酒必積數月而後成今有聖多默殿中其
酒則咄嗟可辨斯一奇已余曰云何先生曰瑪里
布耳國名今改爲聖多默國在西南印度

昔聖多默致命地也其國

聖殿中聞有蒲萄一株視之枯樹耳然至聖多默

瞻禮日彌撒方行必舒葉開花俄而結實及鐸德

將舉聖爵而實已熟矣取而注之于爵則宛然

酒也及彌撒禮畢而樹枯如故至明年瞻禮又復

然余作而嘆曰致命之爲絕德也故天主特愛

之而章示其靈奇耳今吾輩重視此身無論未可

試窘難。卽克已寡慾之功。尙未能稍加萬一。有不
取上主之大懼者耶。

是月之末。林先生復賁余里。廿有七日。從綽問曰。人
之靈魂。有男女之殊乎。先生曰。無殊也。從綽曰。每
見女人記含明悟。多鈍于男子。旣無殊矣。胡敏鈍
若是判乎。先生曰。天主化成人靈魂。原無男女
之異。其中有敏鈍不同。亦由受者氣稟有清濁之
別耳。故論靈魂本體。原各有記含明悟之能。惟氣
稟濁者。其記含明悟必鈍。此實効用之官。不利于

靈性無關也。子不觀之火乎。火之光明。其本性也。
然油清者光必亮。油濁者光必減矣。斯豈火有明
暗之殊哉。則油之清濁。有攸分者也。

廿九日林鳴見問曰人之尚口者必招尤然則出言
亦有道乎先生曰敝邦有成言殊可玩曰君子之
口在心小人之心在口鳴見曰云何先生曰君子
之出言也必于中心停思審處求合理道而後發
故其爲言自無乖謬之失小人則不然浮躁爲言
惟口是尚曾不返而問諸心也子以寡尤難哉

九月初五日漏下數刻余及鳴見侍先生曰告解之誠全由痛悔今彼奉教諸人謂之動悔則可矣謂之痛悔殆十不得一焉鳴見曰悔一也胡動與痛之殊乎先生曰所謂動悔者一當告解之時省察已罪不過得其心之微動耳若痛則必哀怨迫切懲艾而不敢少安以是而仰祈主祐庶乎其可已

又曰且子亦知痛悔字之義乎痛則從广從甬悔則從小從每广者病也甬者通也小者心也每者

每也。余曰。如何。先生曰。人之愛肉軀也。甚于愛靈
魂。今有肉軀病。而不哀傷迫切。投救于明醫之前
者乎。若病在靈魂。則恬不爲意焉。真能痛者。其視
靈魂之病。更甚于肉軀。而一往哀籲迫切之情。必
其與肉軀之病通者也。斯之謂痛。且靈魂之病。又
種種不一。使非中心自訟。每事靡遺。鮮不以粗畧
塞責者矣。故真能悔者。必先之時省。次日省。又加
之月省。而歲省。將從前種種過端。搜剔靡漏。若燭
照。而數計焉。然後以中心之悔出之。斯爲真悔。痛

悔之義若此、是豈動悔所可幾哉。動與痛異、并其悔亦非悔矣。

初六日、余侍林先生、釋三位一體之義、先生詰余曰、罷德肋之子、費畧也、旣言生矣、其于、斯彼利多三多、卽言生亦奚不可、余對曰、向受之艾先生云、罷德肋之子、費畧、可以言生、而于、斯彼利多三多、不可以言生、祇可言發、先生曰、其義云何、對曰、所云生者、必分其父之有、斯謂之生、今費畧之受生也、悉、罷德肋通體焉、非若、斯彼

利多三多爲愛情之發也。故不可以言生。先生曰。
雖然。尙未盡生發之義也。天主三位一體。其義
難明。解者多以神之三司爲譬。罷德肋譬之記
含。費畧譬之明悟。斯彼利多三多則譬之愛
欲。記含卽生明悟。非若愛欲之有待于發也。試觀
之字焉。我記有斯字之形。卽生有斯字之悟。是記
含之生明悟者也。而不能必此心之盡愛。故必記
含明悟。欣悅之情發焉。始成愛欲。此愛欲祇可言
發。而不可言生之義也。知此。則可通三位一體所

云生發二義矣。

初七日瞻禮甫畢林先生詔于衆曰今日萬日畧經載吾主設譬有云昔有一臣負其主之債雖數萬不啻也王按籍而責所償卽鬻產業以及妻子弗盈矣王將逮繫之斯臣惶懼無計因涕泣求宥王憐而悉蠲免焉斯臣出道遇一人乃昔曾負厥債者顧其債甚微而若臣殊不少緩詈之辱之繼之以毆王聞而震怒召而責之曰爾負我債如此其多也我則憐而赦之彼人之負爾債曾幾何哉

爾必詈且毆之。是我方赦爾。而爾曾不赦彼也。今而後必責爾償。遂置之獄。永久弗脫矣。今夫人之五官。皆借之。天主者也。天主必責德行以償。斯其負債也。不既多乎。如人肯痛悔求宥。庶亦可以得赦。然一遇夫譏我侮我。或窘難我者。遂不勝其忿而與之較。則是天主赦我之多。而我曾不赦人之寡也。萬一赫然震怒。必責償而無少貸。永苦之獄。其能免乎。故人受吾主赦罪之恩。必體吾主之意。而恕赦乎人。則上主之義怒。亦庶

卷之四
幾可息已。

初八。日林先生燕坐。余及用籲侍。用籲曰。聞靈魂之體。無所不包。未知一指之微。亦畢貫否。先生曰。然。用籲曰。聞靈魂有記含之德。今云全貫乎。一指。夫指亦何記含之有乎。先生曰。非也。人之靈魂爲一身之主。故身之五官。皆其効用之庶職也。如用目以司視。用耳以司聽。用手足則以司持行。而司記。含者必于腦。故泛論靈魂之體。雖云貫乎。一指。然必責指以記含。則亦將責目。責耳以記含。非通論。

矣

余曰、記倉既由于腦、乃人自幼而壯、壯而老多有
能記不能記之殊。豈腦亦將有異與。先生曰、有。余
請其詳、先生曰、凡人有所聞見、其像必印于腦。第
當幼時、其腦濕、印之似易入。不旋踵而輒忘矣。乃
其老也、其腦乾、印之不能入。故亦莫能記憶。惟方
壯盛之時、其腦則乾濕半、故印之而輒成像。亦可
永久而不忘者也。

余曰、均是人也、胡腦之乾濕、乃隨時異乎。先生曰、

當幼時其火氣正盛上蒸于腦而其體恒濕如水故印之似易入而其像則與俱化矣老則火氣已衰不能上蒸于腦而其體恒乾如石卽印之亦不成像此老與幼所不能含記之由也若稍壯以至中年則火氣漸已得中雖亦上蒸于腦而腦則不乾不濕若爛泥焉故印之而輒成像可以永久不忘也

用籲曰睡之有夢也如之何先生曰人之睡也五官已無所効其用獨是火氣之上騰者皆飲食之

氣蒸而至于腦。于是食蒸浮動。將向來所記。含諸像。顛倒錯亂。幻而成夢。譬諸一確之藥。參苓畢備也。及火候一至。遂蓬勃沸騰。忽而參在上。苓在下。又忽而在左。在右。幻變而莫有定者矣。故人之夜飲過多者。必氣昏而夢濁。食飲有節。則氣平而夢清。壯者氣勝。則夢多。老者氣衰。則夢少。是皆可以類推者已。

十四日、瞻禮甫畢、林先生又謂衆曰、今日萬日畧經、
重舌、主寓訓有日、有貴人、闢一苑、圃、藥、旨、采之

以時而採其實。一日入園見果樹之
園中也。命園人採之。俄行至一樹。其柯幹巍然也。
枝葉菀然也。詰視之。則全無實。園人對曰。某之蒔
此也。三年于茲矣。土膏同。雨露同。其栽培灌漑則
又同。乃三年之內。曾不得一花與實焉。貴人恚曰。
如此。則又安用彼樹爲不如伐而薪之。易以他樹。
園人請曰。薪之固當然。請假一年之期。再加工焉。
若再無花與實。薪之未晚也。貴人許而釋之。夫吾
主比寓訓之意。以貴人者。天地之大主也。苑囿之

樹者。凡在阨格勒西亞中。或今之同聚一堂者。是也。果實者德行也。人而德行純全。則天主必時收採。而登之天國。設三年來。無一善可錄。斯亦無實之樹耳。是豈司教者培植有異哉。一堂之啓迪不殊。乃徒飾外貌而無實德。此傲人也。大主將伐而薪之。以供地獄之火。反不如未奉教者。一經開導。其振拔更易易耳。雖然。一年之期。吾主非不暫假之。聽其新圖。萬一無花與實。猶之昔也。吾主。惟其終爲薪也。則將如彼何哉。

口錄田抄

卷之四

口錄田抄卷之四 終



